

A cambia e fecha di diaranson pa diamars **“Rib’un Chill cu Hebbe Hebbe” ta move pa dia 5 di februari**

Riba parkeerplaats di Postkantoor

E organisado di Hebbe Hebbe, Manuel da Silva di Manuelito's Sports Bar a anuncia diamars merdia cu e gran evento “Rib’un Chill cu Hebbe Hebbe” lo tuma luga otro siman diamars, dia 5 di februari en bes di diaranson. E anuncio aki a bin despues di diferente reunion,

entre otro cu SAC, Polis, cu su patrocinado oficial y tur partner den e organisacion di Hebbe Hebbe. Da Silva a bisa cu a reuni tambe cu Prome Minister Mike Eman, kende el a gradici tambe pa su cooperacion. E decision pa bin cu e proposicion pa move Hebbe Hebbe pa

diamars, dia 5 di februari a bin despues cu Topcar a anuncia cu nan ta celebra nan di 45 aniversario di existencia riba dia 6 di februari. E partnernan den organisacion di “Rib’un Chill cu Hebbe Hebbe” a dicidi di move nan evento pa permiti Topcar tur espacio pa tene nan evento trankilo. Pa loke ta trata “Rib’un Chil cu Hebbe Hebbe” manera ya e publico ta costumbra, lo tin 5 banda LIVE riba escenario dilanti Postkantoor. Chill a anuncia anteriormente



tambe cu como e cerbes oficial di Aruba su Carnaval 59, lo tin hopi regalo special y tambe ora cu zona e bel “Chillin’ Chillin’” tin cerbes gratis pa tur hende gosando di nan Hebbe Hebbe. Manuel da Silva a comenta cu ta casi increibel pa kere cu un evento cu a cuminsa como chikito dilanti su negoshi 15

aña pasa, unda cu amigonan y bisañanan a yega hunto pa un fiesta ey mes, por a crece bira un di e eventonan faborito y mas grandi di Aruba. Aña pasa ta calcula cu tabatin un publico entre 7 pa 8 mil hende. E aña aki no lo spera menos! Ta masha hopi hende ta pendiente di kico Hebbe Hebbe tin como sorpresa y e aña aki, pa e celebracion di 15 aña Hebbe Hebbe ta “Rib’un Chill” cu un cantidad di regalo y cerbes gratis y e bandanan Rincon Boyz, Youth Xtreme, Zeta Band cu Tattoo, OREO cu Caiso Monarch Mighty Talent Jr., Basic One cu Janiro y Fellow. Marca bo kalender, pasobra bo no por perde e fiesta aki: Diamars, dia 5 di februari, “Rib’un Chill cu Hebbe Hebbe”, Postkantoor na Playa. Bin CHILL cu nos!